

Wujud pusat penyelidikan sehati tangani banjir

KUALA LUMPUR - Seorang pakar hidrologi dan permodelan banjir mencadangkan pusat penyelidikan sehati diwujudkan bagi menangani bencana banjir yang mengakibatkan kerugian berjuta-juta ringgit setiap tahun.

Prof Dr Ekhwan Toriman, yang juga Timbalan Naib Canselor (Penyelidikan dan Pembangunan), Universiti Sultan Zainal Abidin (UniSZa) berkata semua agensi berkaitan pengurusan banjir perlu melibatkan diri dalam penyelidikan itu agar dapat mengurangkan kesan dan implikasi bencana kepada negara.

"Banjir berlaku setiap tahun. Kita belanja berjuta ringgit, Kenapa tiada pusat penyelidikan yang khusus dalam konteks kajian ini," katanya pada sesi pembentangan Isu Prosedur Operasi Standard (SOP) dalam Mitigasi Banjir pada Persidangan Kebangsaan Bencana Banjir 'Realiti dan Tindakan' di sini semalam.

Prof Ekhwan berkata setakat ini hanya Jabatan Pengairan dan Saliran (JPS) yang terlibat dalam aktiviti penyelidikan berkaitan banjir.

Beliau turut mencadangkan penduduk yang mendiami kawasan berisiko banjir dan pemaju, diwajibkan membeli insurans agar dapat mengurangkan kerugian harta benda.

"JPS juga perlu diberi kuasa undang-undang bagi mengelak pencerobohan zon penampungan sungai.

"Saya melihat banjir dalam konteks teknikal sangat penting. Mereka perlukan sedikit kepakaran yang mereka boleh ramalkan, menilai dan klasifikasikan."

"Secara kesimpulannya, saya melihat SOP banjir ini sudah lengkap, namun perlu diperkemas. Saya yakin, dengan undang-undang yang sedia ada, kerjasama semua pihak akan dapat menangani masalah ini bersama-sama," katanya. - Bernama."



Ekhwan ketika membentangkan kertas pada Persidangan Kebangsaan Bencana Banjir Realiti dan Tindakan semalam.